

**5/2022 Ebazpena
24/2018 espedientea**

Gasteizen, 2022ko urtarrilaren 24an.

Euskal Autonomia Erkidegoarekiko Ekonomia Itunaren Arbitraje Batzordeak, Violeta Ruiz Almendral batzordeburu andreak eta Sofía Arana Landin batzordekide andreak eta Javier Muguruza Arrese batzordekide jaunak osatutakoak, honako hau erabaki du:

ERABAKIA

Bizkaiko Foru Aldundiak (aurrerantzean BFAk) Zerga Administrazioiko Estatu Agentziaren (aurrerantzean ZAEA) aurrean planteatutako gatazkari buruz, Arbitraje Batzorde honetan izapidetzen ari dena (24/2018 espediente-zenbakia).

I. AURREKARIAK

1. Espedientetik ondorioztatzen da gatazka hau sortzen duen eztabaidaren xedea dela zehaztea zein Administrazioak duen eskumena itsasontzi batean zerbitzuak ematen dituzten langileei dagozkien lan pertsonalaren etekinen PFEZen konturako atxikipenak ordainarazteko.

2. Gai hori arbitraje-batzorde honek 2018ko ekainaren 28ko R6/2018 Ebazpenean ebatzi zuen, 13/2015 Espedienteari buruzkoan, eta Auzitegi Gorenak zuzenbidearen arabera zela berariaz deklaratu zuen, 1.319/2019 zenbakiko epaian, 2019ko urriaren 4koan (Errek. zk.: 411/2018), ezetsi baitzuen ZAEAK ebazpen haren aurka jarritako errekurtsua.

3. Arbitraje Batzordearen ebazpen hark, Auzitegi Gorenak berretsitakoak, Bizkaian egoitza zuen sozietate batek egindako tributu-kontsulta ebatzi zuen; aipatutako sozietateak ordainsariak ordaintzen zizkien beren lana Murtzian egoitza-portua zuen itsasontzi batean egiten zuten langileei. Kontsulta egin zen jakiteko zein Administrazioari (ZAEARI edo BFAri) ordaindu behar zitzaizkion PFEZen konturako atxikipenak, itsasoko langile horien ordainsariei zegozkienak. Arbitraje Batzordeak ondorioztatu zuen administrazio eskuduna zela itsasontzia atxikita zegoen egoitza-portuari zegokiona eta ondore horietarako itsasontzia lantokitze hartzen zela.

Ildo beretik, abenduaren 28ko 10/2017 Legeak –lehen aipatutako R6/2018 Ebazpena eragin zuen gatazka jarri ondoren emana– Ekonomia Itunaren 7. Bat.a) artikuluari idazketa berria eman zionez (gaur egun indarrean dagoena), tripulatazailea atxikita dagoen lantokiaren lurreko kokapenean oinarritu zuen, halaber, Ekonomia Itunaren hutsune historikoa betetzeko irizpidea, itsasoko langileen atxikipenak ordainarazteko eskumenari dagokionez; gaur egun, aldaketa horren ondorioz ebatzi da eskumen hori.

4.- Eskatu da gatazka hau 13/2015 espedienteari buruz 2018ko ekainaren 28an emandako R6/2018 Ebazpenaren ondoreak zabalduz bideratzea, irmoa baita.

II. ZUZENBIDEKO OINARRIAK

1. Maiatzaren 23ko 12/2002 Legeak onetsitako Ekonomia Itunaren 66.Bat.a) artikuluan aurreikusitakoaren arabera, Arbitraje Batzorde honek eskumena du Estatuko Administrazioaren eta Foru Aldundiaren artean planteatutako gatazka hau ebazteko, PFEZen (tributu itundua) lotuneen aplikazioari buruzkoa denez.

2.- Ekonomia Itunaren 68. artikulua, abenduaren 28ko 10/2017 Legeak gehitu zuenak, Arbitraje Batzordearen “prozedura berezi” gisa arautzen du, besteak beste, “ondoreak zabaltzea”rena.

Horiek horrela, Arbitraje Batzordearen ebazpen irmo bidez lehendik ebatzitako beste auzi baten zergati bera duen gatazka bati buruz Arbitraje Batzordean gatazka bat aurkeztu duenak gatazka hori ebazpen irmo horren ondoreak zabalduz ebatz dadila eskatu ahal izango du.

3.- Akreditatu denez gatazka honetan hori eskatu dela eta Arbitraje Batzorde honen iritziz argi dagoenez gatazka horretan sortzen den auziaren eta 13/2015 gatazkan bideratutakoaren zergatia bera dela (gatazka hura 2018ko ekainaren 28ko R6/2018 Ebazpenak ebatzi zuen, zeinak gatazka horren ondoreak zabaltzeagatik justifikatzen baitu ebazpena, irmoa baita), bidezkoa da ebaztea eta R6/2018 Ebazpenaren ondoreak zabaltzea erabakitzea.

Horiek horrela, Arbitraje Batzordeak honako hau

ERABAKITZEN DU

1.- Adieraztea gatazka honetara zabaltzekoak direla ekainaren 28ko R6/2018 Ebazpen irmoaren ondoreak (13/2015 Espedientean emandako ebazpena), eta, beraz, ondorioztatzea itsasontzi batean egindako lanaren etekinengatik PFEZaren konturako atxikpenak ordainaraztea itsasontzia atxikita dagoen egoitza-portua dagoen lurraldeko administrazioari dagokiola, administrazio horren lurralde-eremuan kokatutako lantoki batean emandako zerbitzuetatik eratorritako atxikpenak direlako.

2.- Jarduketak amaitutzat jotzea eta artxibatzea.

3.- Ebazpen hau ZAEARI, Bizkaiko Foru Aldundiari eta zergapekoari jakinaraztea.

